

Siunnersuummut nassuiaatit

Nassuiaatit nalinginnaasut

1. Aallaqqaasiut

Nunami inuussutissarsiutinut tunngatillugu inuussutissarsiormik siuarsaaneq pillugu Inatsisartut inatsisaat nr. 20, 3. december 2012-imeersumi siunertaavoq Kalaallit Nunaanni inuussutissarsiortuni inerisaanerup tamatumunnga tapersiissuteqartarnikkut nukittorsarneqarnissaa. Tapersiisarneq taanna maannamut aningaasaqarnerinnakkut ingerlanneqarpoq. Siunnersuummi Naalakkersuisut aallarnisaasunik ineriartortitsinermik ingerlataqarnernut tapersiisarnissaat ajornarunnaarsinneqassaaq, tassani aallarnisaasut piffissap qaammatit 24-it tikillugit sivissuseqartup ingerlanerani, aallarnisaanerup immikkoortuanut atatillugu, siunnersorneqarsinnaassallutik isumasioqatigineqarsinnaassallutillu.

Siunnersuummi inatsimmut siunertaqqaartoq, aalajangersakkanik sinaakutissiisunik aamma aalajangersakkanik aalajangersimasunik ataqatigiissitsiviusoq, inuiaqatigiinni ineriartortuortuni inuussutissarsiormerup siuarsarneqarnissaanut pisariaqartitsinerusinnaasut malillugit naleqqussaasoqarsinnaanissaanik allannguuteqartitsisoqarsinnaanissaanillu periarfissiisoq, inerisaqqinneqarpoq.

2. Siunnersuummi immikkoortut pingaarnerit

Inatsisip ullumikkut oqaasertaligaanerani, suliffeqarfiit aallarnisarnerannut atatillugu aningaasaqarnikkut tapersiinissamut periarfissaqarpoq, taaneqartartut kittaartaq, kiisalu ilaatigut suliffeqarfimmik pilersitsinissamut allilerinissamullu tunisassianik ineriartortitsineq. Inatsimmi aamma suliassaqarfinnut imaluunniit suliffeqarfinnut immikkuullarissunut aningaasanik ataatsimoortunik immikkoortitsinissaq periarfissaqartinneqarpoq. Tapersiisarnermut aaqqissuussat taakkua inuussutissarsiormerup ineriartortinneqarnissaanut suli aalajangiisuulluinnartumik pingaaruteqarput, aammalu siunnersuummi aaqqissuussanut taakkununnga inatsisitigut tunngavissat sunnerneqanngillat. Taamaattoq misilittakkat takutippaat aallarnisaasut aamma aallarnisarnerup immikkoortuani siunnersorneqarnissamik isumasioqateqarnissamillu pisariaqartitsinissaasartut.

Siunnersuummi Naalakkersuisut aallarnisaasunik ineriartortitsinermik ingerlataqarnermut tapersiinissaat ajornarunnaarsinneqarpoq, tassani aallarnisaasut aallartisarnerup nalaani piffissami qaammatit 24-it tikillugit siunnersorneqarlutik isumasioqateqarlutillu ikiorneqarsinnaallutik. Ingerlatat taakkua ingerlaneranni peqataasut assersuutigalugu tuniniaanissamik nittarsaassinermik inatsisini aamma naatsorsuuserinermi il.il. atuartinneqarsinnaapput. Tamatuma saniatigut

aallarnisaasunik ineriartortitsinermik ingerlataqarnermi peqataasut, aallarnisaasunik allanik assingusumik inissisimasunik, isumasioqateqarnissamut periarfissaqassapput. Siunertaavoq aallarnisaasut aallarterlaatut kukkunernik nalinginnaasunik aqquasaagaqannginnissaaq. Aamma siunertaavoq suliffeqarfiit aallarterlaat iluatsitsisarnerisa pitsanngorsarneqarnissaat aammalu aallarnisaasut akornanni attaveqaaqatigiissitsinissaaq, taamaalilluni imminnut ikioqatigiinnissamut isumasioqatigiinnissamullu periarfissaqassallutik. Aallarnisaasunik ineriartortitsinermik ingerlataqarnerup nalaani suliniummi malunnaatilimmik siuariartortoqarnissaa aalajangiisuulluinnartumik pingaaruteqarpoq.

Aallarnisaasunik ineriartortitsinermik ingerlataqarnermut atatillugu pikkorissaanerup nalaani angalanissamut unnuinissamullu aningaasanik immikkoortitsisoqassaaq. Aallarnisaasut aallarnisaasunik ineriartortitsinermik ingerlataqarnermi peqataasut, piffissami qaammatit 24-it tikillugit sivisussusilimmi agguaqatigiissillugu pikkorissaanerni 4-ini peqataassapput.

2.1 Island-imit aamma Israel-imit misilittakkat

Aallarnisasasunik ineriartortitsinissamut aaqqissuussineq nunani assersuutigalugu Israel-imi aamma Island-imi annertuumik iluatsittumik atornerarpoq. Aallarnisaasunik ineriartortitsinermut aaqqissuussinermi tunngaviusumik eqqarsaataasooq tassaavoq taaneqartartoq ”market-failure” iluarsiivigineqarnissaata kissaatigineqarnera, tassani ingerlatsinermut isumassarsianut annaasaqaataasinnaasunut kisinnili iluaqutaasorujussuusinnaasunut annaasaqaataasinnaasumik aningaasasaqarneq annikitsuinnaalluni. Tunngaviusooq tassaavoq nutaaliernerup ungasissumut inuiaqatigiinnut sunniuteqarsinnaanissaata niuerfimmi naleqanngippallaartut isigineqarnera. Island-imi naalakkersuisut tungaanniit atortorissaarutinik atugassiisoqarsimavoq, tassani suliffeqarfimmik inerisaanissaaq aammalu isumasioqateqarnissaaq periarfissaqartinneqarluni.

Israel-imi qinnuteqartut pisortanit nalilersorneqartarput, aammalu suliniutit pimoorussinerpaat kisimik, periarfissaqarfiusutut nalilerneqartut, aallarnisaasunik ineriartortitsinissamut ingerlaqqitsinneqartarlutik. Aallarnisaasunik ineriartortitsineq 100 procentimik namminersortunit aningaasalersorneqarpoq, aammalu nalilersuineq ingerlanneqareeraagat pisortat ingerlatami peqataajunnaartarput.

Aallarnisasasunik ineriartortitsinissamut aaqqissuussineq ukiuni marlunni ingerlanneqartarpoq, aammalu ingerlaqqinnissaaq isumaqarnerooq takuniarlugu ukioq affakkaarlugi suliniut misissorneqartarluni.

Aallarnisasasunik ineriartortitsinissamut aaqqissuussinernit taakkunanga misilittakkat takutippaat aallarnisasasunik ineriartortitsinissamut aaqqissuussinerup iluatsitsiviulluarnissaanut makkua naammassineqartariaqartut:

- Suliniutit ataasiakkaat passunneqassapput, paaqqutarineqassapput aammalu pitsaassuseqartumik unammilligassaqaassallutik – tassa imaappoq suliniut aallarnisaasumik ineriartortitsisumi qanimut inissinneqassaaq, tassani sulisut pikkorissut ulluinnarni suliniummik malinnaasinnaassallutik.
- Suliniutit ataasiakkaat nutaaliortut akornanni naammattunik ”isornartorsiuisussaqaarfiusumi” ineriartortinneqassapput.
- Suliniutinut aningaasalersuinerup ilusiliineq suliniutip ineriartortinneqarnissaanut aporfiussanngilaq.
- Suliniut niuernerup tunngaveqartumik piujuartinneqarsinnaassaaq.

Suliniut iluatsitsiviulluortoq paasinarsippat, aallarnisaasumik ineriartortitsisup ingerlaavartumik iluanaaruteqarnertut ittumik utertitsissaaq.

Aallarnisaasumik ineriartortitsisoq nutaaliortup aamma aallarnisaasumik ineriartortitsisup akornanni imminnut isumaqatigiissuteqarfiginermikkut ingerlatseqatigiiffimmi peqataajunnaarsillugu akilerneqassaaq, kisianni pingaarnertut maleruagassaassalluni piginnittuuginnarnissaaq.

2.2 *Kalaallit Nunaanni aallarnissaasunik ineriartortitsinermik ingerlataqarneq*

Israel-imi imaluunniit Island-imi aaqqissuussineq assiliinnarneqarsinnaanngilaq, kisiannili paarlattuanik aaqqissuussineq Kalaallit Nunaannut pissutsinut naleqqussarneqarsinnaavoq aammalu aallarnisaasunik ineriartortitsinermik ingerlataqarnermik pisortanit maleruagassiivigineqartumik pilersitsisoqarsinnaalluni.

Sumiiffissaq aalajangersimasoq, aallarnissaasunik ineriartortitsinermut illumik taagorneqartoq, Kalaallit Nunaanni innuttaasut siammarsimasuunerat pissutigalugu ajornarpoq, taamaattumik siunnersuummi pikkorissaanerit aallarnisaasut peqataaffigisinnaasaat, kiisalu aallarnisaasunik allanik isumasioqateqarnissaaq tunngavigineqarput.

Aamma sulisunik pikkorissuseqartunik, ulluinnarni suliniutinik malinnaasussanik, aallarnisaasut neqeroorfiginissaat ajornarpoq, kisianni tamatumunnga taarsiullugu teknologiip nutaaliaasup internettimi ataatsimoorfissamik, aallarnisaasut ulluinnarni apeqqutissaannut iluaqutaasinnaasumik, pilersitsinissaaq ajornarunnaarsippaa.

Inatsisissatut siunnersuut inatsimmut atuuttumut saniliullugu

<i>Oqaasertaliinerit atuuttut</i>	<i>Inatsisissatut siunnersuut</i>
	<p style="text-align: center;">§ 1</p> <p>Nunami inuussutissarsiuutinut tunngatillugu inuussutissarsiornermik siuarsaaneq pillugu Inatsisartut inatsisaat nr. 20, 3. december 2012-imeersumi makkua allanngortinneqarput:</p>
	<p>1. § 1 kingorna ilanngunneqassaaq: ”§ 1 a. Aallarnisaasunik ineriartortitsinermik ingerlataqarnerit piffissamut killiligaasut, tassaasut aallarnisaasunut aalajangersimasunut pikkorissaanerit aamma siunnersuineq, aammalu assersuutigalugu amerlanerusunik imaluunniit annertunerusunik inuussutissarsiornermi ingerlataqalerluni imaluunniit inuussutissarsiornermut suliffeqarfimmi sulisunut suliffissaqartitsinerulerluni inuiaqatigiit aningaasaqarnerannut iluaqutissartaqartitsilersussatut nalilerneqartut, tapersiivigineqartarnissaat siunertaralugu, aallarnisaasunik ineriartortitsinermut aaqqissuussanik aningaasalersuinissamut aningaasaliissutinik ataatsimoortunik pilersitsisoqassaaq.”</p>
	<p>2. § 5 kingorna ilanngunneqassaaq: ”§ 5 a. Tapersiineq aamma aallarnisaasunik ineriartortitsinermut ingerlatanut tunniussivigineqassaaq. <i>Imm. 2.</i> Imm. 1 naapertorlugu aallarnisaasunik ineriartortitsinermut ingerlatat tassaapput pikkorissaalluni aamma siunnersuilluni ingerlataqarnerit piffissamut killiligaasut, aallarnisaasunut aallarnisarnerup immikkoortuaniittunut, aammalu aallarnisaasunut suliffeqarfiutiminni Kalaallit Nunaanni Inuussutissarsiummik Ingerlataqartunik Nalunaarsuiffimmi qaammatinit 12-init sivikinnerusumik nalunaarsorsimasimasunut,</p>

	<p>ikiorsiissutigineqarsinnaasut.</p> <p><i>Imm. 3.</i> Aallarnisaasunik ineriartortitsinermut ingerlatanut tapersiissutit piffissamut qaammatit 24-it ikillugit sivisussusilimmut tunniunneqarsinnaapput.</p> <p><i>Imm. 4.</i> Naalakkersuisut aallarnisaasunik ineriartortitsinermut ingerlatanut aalajangersakkanik erseqqinnerusunik aalajangersaasinnaapput, ilanngullugit tapersiissutit tunniussinissamut atugassarititaasut.”</p>
<p>§ 10. Neriorsuineramik aqutsineq tapiissutinillu akiliuteqarnek pillugit kommunalbestyrelsimik imaluunniit suliffeqarfimmik allaffissornermik ingerlataqartumik Naalakkersuisut isumaqatigiissusiorsinnaapput.</p>	<p>3. § 10, <i>imm. 1</i>, imatut oqaasertalerneqassaaq: ”§ 10. §§ 5 aamma 5 a malillugit tapersiissutit allaffissornikkut aqunneqarnissaat pillugu kommunalbestyrelsimut imaluunniit ingerlatseqatigiiffimmut allaffissornermik suliaqartumut Naalakkersuisut isumaqatigiissuteqarsinnaapput.”</p>
	<p style="text-align: center;">§ 2</p> <p>Inatsisartut inatsisaat ulloq xx. xxxx 2016 atuutilerpoq.</p>

3. Pisortanut aningaasaqarnikkut allaffissornikkullu sunniutaasussat

Siunnersuut aningaasat tunisassianik ineriartortitsinermut, kittaartakkamut aamma suliaasaqarfimmut aalajangersimasumut aningaasanut inatsimmi konto 64.10.17-imi immikkoortinneqartut allatut pingaarnersuiffigineqarnerisigut, Greenland Business-imut kiffartuunneqarnissamut isumaqatigiissummut killissaliussat iluanni aningaasalersorneqarpoq.

Taamaattumik siunnersuut pisortanut allanik aningaasaqarnikkut sunniuteqassanngitsoq naliliisoqarpoq.

Aallarnisaasunik ineriartortitsisussaq aqutugalugu tapersiinissamik neriorsuuteqarnek taamaalaat ukiumoortumik aningaasanut inatsisini aningaasaliissutaasut iluanni tunniussivigineqartassaaq.

4. Inuussutissarsiortunut aningaasaqarnikkut allaffissornikkullu sunniutaasussat

Siunnersuummi inuussutissarsiortut pitsaanerusunik atugassaqartinneqarnissaat qulakkeerneqassaaq, tassami maannakkut suliaasaqarfimmut aalajangersimasunut imaluunniit

suliffeqarfinnut immikkuullarissunut aallarnisarnerup nalaani siunnersorneqarnissaq tapersiivigineqarnissarluni periarfissaqalissamat. Taamaalilluni naliliisoqarpoq siunnersuut inuussutissarsiortunut aningaasaqarnikkut allaffissornikkullu pitsaasunik sunniuteqassasoq.

5. Avatangiisinut, pinngortitamut inuillu peqqissusaannut sunniutaasussat

Siunnersuut avatangiisinut, pinngortitamut inuillu peqqissusaannut sunniuteqassagatinneqanngilaq.

6. Innuttaasunut sunniutaasussat

Siunnersuut innuttaasunut sunniuteqassagatinneqanngilaq.

7. Sunniutaasussat allat annertuut

Siunnersuut allanik annertuunik sunniuteqassagatinneqanngilaq.

8. Oqartussaasunik kattuffinnillu il.il. tusarniaaneq

Siunnersuut piffissami xx. xxxx 2015 - xx. xxxx 2016 tusarniaanermut nittartakkamiippoq kiisalu oqartussaasuni, kattuffinni il.il. makkunani tusarniaassutigineqarluni:

Aningaasaqarnermut Nunamullu Namminermit Naalakkersuisoqarfik, Aalisarnermut, Piniarnermut Nunalerinermullu Naalakkersuisoqarfik, Avatangiisinut Pinngortitamullu Naalakkersuisoqarfik, Ineqarnermut Naalakkersuisoqarfik, KANUKOKA, Sulisitsisut, KNAPK, SIK, ICC, Kommuneqarfik Sermersooq, Kommune Kujalleq, Qaasuitsup Kommunia, Qeqqata Kommunia, Grenland Business, Visit Greenland, Sermersuup Inuussutissarsiortnermut siunnersuisooqatigiivi, Qeqqata Inuussutissarsiortnermut siunnersuisooqatigiivi.

Oqartussaasunit, kattuffinnit il.il. makkunanga tusarniaanermut akissuteqaat tiguneqarpoq:

Aalisarnermut, Piniarnermut Nunalerinermullu Naalakkersuisoqarfik, Aningaasaqarnermut Nunamullu Namminermit Naalakkersuisoqarfik, Kommuneqarfik Sermersooq, KNARP, GA, Greenland Venture, Pisortaq aamma ICC.

Tulliuttuni tusarniaanermut akissuteqaatit aammalu allannguutissatut siunnersuutit tusarniaanerup nalaani tiguneqartut sammeneqarput.

Oqaatigineqassaaq tusarniaanermut akissuteqaatit uingasumik allassimasut, taamaallaat pingaaruteqarnerinik naliliineq tunngavigalugu pingaarnerinnartigit issuarneqarmata.

Tusarniaanermut akissuteqaatit tamarmik tamakkiisunngorlugit Inatsisartuni ataatsimiititaliamut suliarinnittussamat ilanngullugit nassiunneqarput.

Siunnersuummi aalajangersakkanut ataasiakkaanut nassuiaatit

§ 1-imut

Nr. 1-imut

Aalajangersakkami aalajangersarneqarpoq Naalakkersuisut aallarnisaasunik ineriartortitsinermik ingerlataqarnissamut aningaasassanik ataatsimoortunik pilersitsisinnaasut, siunertarineqarluni assersuutigalugu amerlanerusunik imaluunniit annertunerusunik inuussutissarsiornermi ingerlataqalerluni imaluunniit inuussutissarsiornermut suliffeqarfimmi sulisunut suliffissaqartitsinerulerluni inuiaqatigiit aningaasaqarnerannut iluaqutissarsititsinissaq anguniarlugu, suliffeqarfiit aallarterlaat aammalu Kalaallit Nunaanni inuussutissarsiortut ataatsimut isigalugit nukittorsarneqarnissaat.

Tassaniippoq aallarnisaasunik ineriartortitsinermik ingerlataqarnerit, inuiaqatigiinnut tamarmiusunut iluaqutaasusussamik inuussutissarsiornermi siuariartortitsinermut, iluaqutaassasut. Aallarnisaasunik ineriartortitsinermik ingerlataqarnerit, aallarnisaasunut aamma suliffeqarfinnut aallarterlaanut killissaliussanik pilersitsinikkut, iluaqutaassapput, tamannalu aqqutigalugu aallartisarnerup nalaani taakkununga ikiorsiissallutik aammalu siuariartortitsinermik suliffissaqartitsinermillu ilaalu ilanngullugit pilersitsinissaq ajornarunnaarsissallugit.

Nr. 2-imut

Imm. 1-imut

Aalajangersakkami allassimasoq Naalakkersuisut aallarnisaasunik ineriartortitsinermik ingerlataqarnernut tapersiinnaasut.

Imm. 2-imut

Naalakkersuisut taamaalillutik aallarnisaasunik ineriartortitsinermik ingerlataqarnernut, tuniniaanissamik nittarsaassinerup, inatsisit naatsorsuuserinerullu il.il. iluanni pikkorissaanernik neqerooruteqarnikkut aallarnisaasunik inerisaanissamik ikiunnissamillu siunertaqartumut, tapersiinnaapput pilersitsisinnaallutillu. Pikkorissaanerit aamma Naalakkersuisut tapersiissutinut aaqqissuussaannut allanut qinnuteqarnermut immersugassanik immersuinermut imaluunniit suliassaqarfimmi immikkuullarissumi suliffeqarfimmik aallarnisaanermut atatillugu piumasagaatinut allanut ikiorneqarnissamut tunngassuteqarsinnaapput, tassanilu ilaapput uumasut nakorsaannit akuersissuteqarnerit, umiatsianut p-imut akuersissuteqarnerit il.il.

Aallarnisaasunik ineriartortitsinermik ingerlataqarnerit nalaanni aallarnisaasup tamanna pisariaqartippagu, aallarnisaasooq siunnersorneqarsinnaassaaq. Siunnersuineq elektroniskimik, oqarasuaatikku, internettimi naapittarfinni imaluunniit ornigulluni ataatsimiinnermi pisinnaavoq.

Aallarnisaasunik ineriartortitsinermik ingerlataqarneq aalajangersagaq malillugu aallarnisaasumut aallarnisaanerup nalaaniittumut, ikiorsiissutaasinnaavoq.

Siunnersuut malillugu aallarnisaasooq aallarnisaanerup nalaaniittutut isigineqarpoq aallarnisaasooq suliniummut isumassarsisimappat aammalu ingerlatsinissamut pilersaaruteqarluni, kisianni suliliffeqarfimmik Kalaallit Nunaanni Inuussutissarsiummik Ingerlataqartunik Nalunaarsuiffimmi (IIN) suliliffeqarfimmik Nalunaarsuisitsisimanani.

Aammattaq aallarnisaasup suliffeqarfiutaa Kalaallit Nunaanni Inuussutissarsiummik Ingerlataqartunik Nalunaarsuiffimmi (IIN) i qaammatit 12-it inorlugit nalunaarsorsimasimappat, aallarnisaasooq aallarnisaanerup nalaaniittutut aammalu siunnersuummi pineqartunut ilaasutut isigineqarpoq.

Imm. 3-imut

Aalajangersakkami allassimavoq aallarnisaasunik ineriartortitsinermik ingerlataqarneq piffissamut killiligaasumik ingerlanneqassasoq, aammalu aallarnisaasunik ineriartortitsinermik ingerlataqarnermut tapersiissutit taamaallaat piffissamut qaammatit 24-it angullugit sivissusilimmuut tunniunneqarsinnaasut, tamatum kingorna suliniut aallarnisaasunik ineriartortitsinermik ingerlataqarnissami pineqartunut ilaajunnaassaaq. Aallarnisaasunik ineriartortitsinermik ingerlataqarneq assersuutigalugu ukiumi ataatsimi januaarip aallaqqaataaniit ukiup tulliani 31. decembarip 31-anut ingerlanneqarsinnaavoq.

Imm. 4-imut

Naalackersuisut aallarnisaasunik ineriartortitsinermik ingerlataqarnernut aalajangersakkanik erseqqinnerusunik aalajangersaasinnaapput. Naalackersuisut taamaalillutik ilaatigut aalajangersaasinnaapput ingerlataqarnerup nalaani pikkorissaanerit qassiussanersut, aammalu ingerlataqarnerit qanoq aqqissuunneqassanersut. Naalackersuisut aamma tapersiissutinik tunniussinissamut atugassarititaasunik aalajangersaasinnaapput.

Nr. 3-imut

Aalajangersagaq malillugu Naalackersuisut §§ 5 aamma 5 a malillugit tapersiissuteqartarnernik allaffissornikkut aqutsinissaq pillugu ingerlatseqatigiiffimmik allaffissornermik ingerlataqartumik imaluunniit kommunalbestyrelsinut ataasiakkaanut isumaqatigiissuteqarsinnaapput.

Taassuminnga allaffissornermik aqutsineq ilaatigut siunnersuut manna aammalu maleruagassat atugassarititaasullu Naalakkersuisut aalajangersagaat tunngavigalugit pisussaassaaq.

Suleriaaseq tassaavoq tapersiissutitut aqqissuussanut tunngatillugu suliassanik suliarinninnermik suliaqarneq ingerlatseqatigiiffimmit allaffissornermik suliaqartumit isumagineqartoq. Ingerlatseqatigiiffik allaffissornermik suliaqartoq, qinnuteqaatitut nalunaarusiornernullu tunngatillugu taakkunani ullumikkut toqqaannartumik qinnuteqartunut attaveqartooreerpoq ilitersuussisartooreerlunilu. Taamaattumik ingerlatseqatigiiffik allaffissornermik suliaqartoq taanna tapersissutitut aqqissuussanik isumaginnittuusoq, aamma aallarnisaasunik ineriartortitsinermik ingerlataqarnernik isumaginnittunngussappat, pissusissamisuussaaq.

§ 2-imut

Siunnersuutigineqarpoq inatsit ulloq xx. xxxx 2016 atuutilissasoq.